

BATAKURU YUUDU NDUN

1 ¹ Immorde e an min Yuudu, nduu kurkaadu Iisaa Almasiihu on, dun ko oo mijnpiraawo Yaaquuba, haa e bee noddaabe, be Alla Baabaajo on yidi, maraabe Iisaa Almasiihu on. ² Yo yurmeende e buttu e giggol sowindirane on.

Fii Jannoobe Penaale 6en

(2Pe. 2.1-17)

³ Yibbe, e nder ko mi marnoo faale tiidudo fii windangol on fii kisiyee mo hawtuden on, mi taw bee mi winda taho fii wakkilingol on no tippiranon gomdinal hewtinaangal yimbe Alla 6en nde wootere haa poomaa. ⁴ Ko fii wobbe be jaawoore mun windananoo gila neebii no bisii e hakkunde mon, dun ko be rewataa Alla 6en. Hibe waylude moyyere Alla men on jiibaare, be yeddi Iisaa Almasiihu on, on Hooreejo men e Joomi men bajjo.

⁵ Mido faalaa andintinde on ko andudon moyy'a, bay Joomiraado on dandii jamaa *Isra'iila on e nder leydi *Misira ndin, bawto dun o muluno kadi be gomdinaa wonnoobe hakkunde mabbe 6en. ⁶ Awa kadi malaa'ikaabe hawkunoobe nokkuure mun nden be ronki jogaade bawgal ngal be halfinaa ngal, o jolkii be jolokooje de be seedataa, o marii be ka nder nibe haa jande jalaande mawnde jaawoore nden. ⁷ Ko wano non kadi, bee yimbe dee ca'e Saduumma e *Amuura wondude e ca'e de de kawtiri den, wadirnoo jinaa, hibe dabbaynoo yiidugol e mbalndi no haaniraa, ben wadaa misal fii wonoyaybe e ley lette yiite poomayankeeewe ngen.

⁸ Ko wano non kadi, ben yimbe ko mijotoobe mijiwoji mehi, be tuunina bandu ndun, be hoyna laamateeri Joomiraado on e ruuhuubi din ka kammu. ⁹ E hin-le, fewndo Miikaa'iilu oo malaa'ikaajo mawdo yeddondiri e Ibuliisa, be poodondiri fii furee Muusaa on, kanko Miikaa'iilu o suusaano mo jaawirde hoyre, o wi'uno tun:

«Yo Joomiraado on donkine!»¹⁰ Kono ɓen yimbe no hoyna ko ɓe andaa, ko ɓe andani hoore mabbe kon kadi no wa'i wa mummunte di alaa mijoo-miccoo, dun-le ko halkaydun ɓe.

¹¹ Bone wonanii ɓe, ko fii ɓe jokkii laawol Qaayiina ngol^a, ɓe ukkori e ella fii hebugol njoddi wano Bal'ama non^b, awa kadi ɓe muliri sabu murtaldu mabbe wano Qooraha non^c. ¹² Ko ɓe baade ɓaleeje ka mottondire mon fii hiraande jokkere endan. Hibe wada mbeleede e ɓaawo hersa, hibe hittini fii hoore mabbe tun. Ko ɓe duule de aldaa e ndiyan, de hendu sorotoo naba. Ko ɓe ledde dabbunde de aldaa e ɓibbe, mayde laabi didi, bora. ¹³ Ko wano morloode ndiyan jaadude bugitortoo ngufo ka sera baharu, tuunina mo non, ko wano non kambe kadi ɓe tuuninirta wobbe goo kuude mabbe hersiniide. Hibe wa'i wa koode yiilotoodé, ɓe niwre nibe maranaa haa poomaa. ¹⁴ Ko fii mabbe kadi, Hanuuka, on njeedidaabo gila e *Aadama, hiitinoo*, o wi'i: «Awa, Joomiraado on arii wondude e laabube makko guluuje guluuje, ¹⁵ fii wadugol jaawoore e hoore fow, e fii hollugol ɓe rewataa Alla ɓen fow kuude mabbe bonde den, e kala kongudi sattudi di junuubankeebe, ɓe rewataa Alla ɓen, wowli e hoore makko!» ¹⁶ Ben ko yimbe ȝormotoobe, woytotoobe, jokkube himmeeji mun, ɓe tawata kundule mun no wowla haalaaji manti, mantoobe yimbe fii nafa mun.

Fii Waajagol Gomdinbe ɓen

¹⁷ Kono onon, yo yibbe, anditee fii waajuuji di bee *sahaabaabe Iisaa Almasiihu Joomi men on hiitinoo, ¹⁸ hibe wi'aynoo on: «Ka saa'iiji sakkitori woodoyay

^a1.11a Fud. 4

^b1.11b Ada. simooje 22-24

^c1.11c Ada. 16

yawitiibe, jokkoyaybe himmeeji mun bondi di yaadaa e faale Alla on.»^d ¹⁹ Awa e hino ben, ko bee waddoobe, jokkubé mijooji aduna, be Ruuhu Alla on alaa e mun.

²⁰ Kono onon non yo yibbe, tiidinee ngurndan mon dan e hoore gomdinal mon hormorteengal ngal, tororon Alla bawgal *Ruuhu Seniido on, ²¹ catodon e giggol Alla ngol, habbodon yurmeende Iisaa Almasiihu Joomi men on, fii yedugol on *ngurndan poomayankejan.

²² Yurmee sikkitiibe ben, ²³ faaboron beya kadi jattingol be yiite, yurminiron beya yurmeende wondude e kulol, e nder anugol tuundi haa aja tuundi conci tuuniniraadi kuude bandu.

Du'aa fii Rawnagol

²⁴ Awa, on Alla waawudo on dandude kala yanal, fejnina on yeeso mangu mun ngun e nder weltaare mon, tawa on felnaaki, ²⁵ ko kanko Alla bajjo on, on Dandirdo en Iisaa Almasiihu Joomi men on, darja e mangu mawngu e doole e bawgal wonani, ado saa'iiji din fow, e jooni, e haa poomaa. Aamiina!

ÉPÎTRE DE JUDE
en Langue Pular (Fouta-Jalon)
République de Guinée
© 2013 Traducteurs Pionniers de la Bible
en collaboration avec
Mission Protestante Réformée

^d1.18 2Pe. 3.3